

**समां - 12:25 hrs.**

## LG- Basohli Workshop

उपराज्यपाल मनोज सिन्हा होरें अज्ज बतौर मुख परौहने IIM जम्मू च बसोहली चित्रकारी सरबन्धी कार्यशाला दी शुरुआत कीती। एहदा सरिस्ता IIM जम्मू आसेया Anandam-The Center for Happiness ते Indira Gandhi National Centre for the Arts दे जम्मू Regional Centre दे सहयोग कन्नै कीता गेदा ऐ- जेहदा दा मकसद बच्चें गी इस चित्रकारी कन्नै वाकफ कराइयै एहदे लेई प्रेरित करना ते रिवायती बसोहली स्कूल च परतियें नमैं सिरिया जान भरना ऐ। बसोहली चित्रकारी अपनी चित्रकारी दी विशेष कृतियें लेई जानी जंदी ऐ ते एह खिते दी परानी कला संस्कृतिएं चा इक ऐ।



## Dy. CM Delegations

उपमुख्यमंत्री सुरेन्द्र चौधरी हों कल जम्मू च बक्ख-बक्ख प्रतिनिधिमंडलें ते व्यक्तिगत तौर पर लोकें कन्नै मलाटी कीती ते उंदी मंगें ते समस्याएं गी सुनेया। बैठक दौरान उपमुख्यमंत्री हों विकास- बुनियादी जरूरतें ते भलाई-बेहतरी आहली स्कीमें कन्नै जुड़े मामलें ते मसलें गी बी सुने। उनें प्रतिनिधिमंडलें गी भरोसा दोआया जे उन्दी जायज मंगें ते मसलें दा समें-सिर हल कीता जाग। सुरेन्द्र चौधरी हों भरोसा दोआया जे सरकार लोकें

दियें समस्याएं गी हल करने लेई ते खिते दे पूरे-पराते विकास लेई वचनबद्ध ऐ। उनें आखेया जे एह सब्ब किश मुतलका- मैहकमे बशकार बेहतर तालमेल राएं कीता जाग।

<><><><><><>

## CS Mining

मुख सचिव अटल डुल्लु होरें खान्ने सरबंधी मैहकमे दी इक समीक्षा बैठक लाइयै- इस खेतर च कीते जा'रदे सुधारें- राजस्व कठेरने दी प्रक्रिया ते तकनीकें पर आधारित होरनें पैहलकदमियें दा आकलन कीता। उनें खनिजें गी इक थाहरा दुई थाहर पुजाने लेई 26 जनवरी 2026 तगर लाज़मी GPS, FRID ते e-चलान प्रणालियें गी लागू करने दे निर्देश दिते। मुख सचिव होरें खान्ने दी निगरानी आली संगठित प्रणाली दा जायजा लैता- जेहदे च गड़ियें आहले मंच ते ATMC कैमरें स्थापित करना शामिल हा- तां जे गैर-कनूनी तौर पर खान्नां कड्डने पर रोक लाई जाई सकै। श्री डुल्लु होरें खनिज ब्लाकें दे साईंसी ढंगै सिर आंकलन- बंद पेदियें खान्ने गी चालू करने ते नियम-कायदें दी सख्ती नै अमल-आवरी जकीनी बनाने लेई बी आखेया। मैहकमे नै गैर-कनूनी तौर पर खान्नां कड्डने दे 14 मामलें दा पता लाइयै उन्दे पर 90 लक्ख रपे दे जुर्माने लाए न।

<><><><><><>

## R-Day Prep

जम्मू संभाग दे बक्ख-बक्ख जिलें जियां -उधमपुर- किशतवाड़ ते डोडा च दे गणतंत्र दिवस लेई तयारियां चला'करदियां न। सरबन्धत जिला प्रशासनें इस राश्ट्री ध्याड़े लेई बंदोबस्तें गी

मुकदा रुप देने गितै हाल च गै समीक्षा बैठकां लाइयां न। इस मौके पर जेहड़े बक्ख-बक्ख पैहलुएं पर चर्चा कीती गई उंदे च लोकें दे बौहने-बैरिकेड लाने- सुरक्षा- ट्रैफिक प्रबंधन- साफ-सफाई- बिजली ते पानी दी सप्लाई- फर्स्ट Aid- लोकें गी सम्बोधित करने लेई लोड़चदी प्रणाली ते अगग स्हालने आले दस्ते दी तैनाती आले मामले मुख हे। सरबंघत अधिकारियें बक्ख-बक्ख मैहकमें बश्कार नेइमे तालमेल दी जरुरतै पर जोर पाया तां जे इस आयोजन गी सुरक्षित ते बवस्थित ढंगै सिर तोढ़ चाढ़ेया जाई सकै। प्रशासन नै सब्बनै सरबंघत धड़ें गी आखेया ऐ जे ओह गणतंत्र दिवस आले समारोहें लेई अगेत्रे गै सब्बै त्यारियां करी लैना जकीनी बनान।

<><><><><><>

## Polio Vaccine

राष्ट्रीय टीकाकरण दिसव 2025 तैहत पल्स-पोलियो अभियान जम्मू-कश्मीर च 21 दिसम्बर थमां शुरु होग। इस दौरान 5 बरे तगर दी उमरी दे 19 लक्ख थवां बद्ध बच्चें गी पोलियो दियां बूदा पलाइयां जागंन। घर-घर जाइयै 22 ते 23 दिसम्बर गी ए बूदा पलाइयां जागंन तां जे कोई बी बच्चा खुंजी नैई जा। अधिकारियें दस्सेया ऐ जे एहदे लेई 10 जहार 993 बूथ कायम कीते गे न ते 518 गश्ती दल बी लाए गे न। मीडिया राहें बी इस बारे जागरुकता फैलाई जा'रदी ऐ- तां जे जम्मू-कश्मीर गी पोलियो मुक्त रखेया जा।

<><><><><><>

## IPL Cricket

कश्मीर दे बारामुला जिले दा बसनीक क्रिकेट खडारी Auqib Nabi Dar IPL Season-19 Mini Auction च सब्बनै थवां महंगा खडारी रेया। उसी Delhi Capitals नै 8 करोड़ 40 लक्ख रुपें च खरीदेया ऐ। मुखमंत्रि उमर अब्दुल्ला होर Auqib गी मुबारकबाद दिंदे होई इसी केन्द्र शासित प्रदेश आस्तै मानै आहली उपलब्धी करार दिता। उधमपुर दे इक खडारी Brijesh Sharma गी Rajasthan Royals लेई तालेया गया ऐ। इनै खडारियें दी ताल कन्नै जम्मू-कश्मीर च क्रिकेट खडारियें गी अपनी छमता दा बड्डे मंच पर प्रदर्शन करने दा मौका थहोग ते कन्नै होरनें नौजवानें गी बी खेड्डें च हिस्सा लैने लेई प्रेरणा हासल होग।

<><><><><><>

#### Weather Update

जम्मू-कश्मीर च मौसम 20 दिसम्बर तगर खुशक बने दे रौहने दी मेद ऐ ते मौसम सरबन्धी ताजा जानकारी मजुब- कुसै बड्डी गतिविधि दी इस दरान कोई मेद नैई ऐ। 21 दिसम्बर गी कश्मीर खिते च ते जम्मू च बक्ख-बक्ख थाहरें पर हौली बरखा जां बर्फबारी होई सकदी ऐ। 22 थमां 25 दिसम्बर तगर अद्दे-दुब्बे तौरा पर बद्दल छाए दे रौहने दी मेद ऐ- जिसलै कि 26 दिसम्बर गी आम तौरा पर बद्दल छाए दे रौहगंन। अधिकारियें चेतावनी जारी कीती ऐ जे केई इलाकें च हल्की शा दरम्यानी धुंध पौने दी मेद ऐ- जेहदे करी केन्द्र शासित प्रदेश च गड्डी चलाने आहलें गी द'नाक दूर दिक्खने च बी परेशानी आई सकदी ऐ ते यातायात बी प्रभावित होई सकदा ऐ।

<><><><><><>